

和. 16
1602
8



門和16
1602
8



柳文卷之三十四

書

與太學諸生喜詣闕留陽城司業書



二十六日集賢殿正字柳宗元敬致尺牘太學諸生足下
始朝廷用諫議大夫陽公為司業諸生陶煦醇懿熙然大
洽于茲四祀而已詔書出為道州僕時通籍光範門就職
書府聞之悒然不喜非特為諸生戚戚也乃僕亦失其師
表而莫有所矜式焉既而署吏有傳致詔草者僕得觀之
蓋主上知陽公甚熟嘉美顯寵勤至備厚乃知欲煩陽公
宣風裔土覃布美化于黎獻也遂寬然少喜如獲慰薦于
天子休命然而退自感悼幸生明聖不諱之代不能布露

柳文

卷之三十四

一

所蓄論列大體聞于下執事冀少見採取而還陽公之南也翌日退自書府就車于司馬門外聞之于抱關掌管者道諸生愛慕陽公之德教不忍其去頓首西關下懇悃至願乞留如故者百數十人輒用撫手喜甚震抃不寧不意古道復形于今僕嘗讀李元禮嵇叔夜傳觀其言太學生徒仰闕赴訴者僕謂訖千百年不可覩聞乃今日聞而觀之誠諸生見賜甚盛於戲始僕少時嘗有意遊太學受師說以植志持身焉當時說者咸曰太學生聚為朋曹侮老慢賢有墮窳敗業而利口食者有崇飾惡言而肆鬪訟者有凌傲長上而諍罵有司者其退然自克特殊於眾人者無幾耳僕聞之恟駭恒悸良痛其遊聖人之門而眾為是

暗暗

徒合切

也遂退託鄉閭家塾考厲志業過太學之門而

不敢踴

音顧

尚何能仰視其學徒者哉今乃奮志厲義出

乎千百年之表何聞見之乖刺

虛達切

歟豈說者過也將亦

時異人異無嚮時之桀害者耶其無乃陽公之漸漬導訓明效所致乎夫如是服聖人遺教居天子太學可無愧矣於戲陽公有博厚恢宏之德能容善偽來者不拒曩聞有狂惑小生依託門下或乃飛文陳惡醜行無賴而論者以為言謂陽公過於納汙無人師之道是大不然仲尼吾黨狂狷南郭獻譏曾參徒七十二人致禍負芻孟軻館齊從者竊褻彼一聖兩賢人繼為大儒然猶不免如之何其拒人也俞備之門不拒病夫繩墨之側不拒枉材師儒之席

不拒曲士理固然也且陽公之在下朝四方聞風仰而尊之貪膏苟進邪薄之夫庶得少汨其志不遂其惡雖微師尹之位而人實具瞻焉與其宣風一方覃化一州其功之遠近又何量哉諸生之言非獨爲己也於國體實甚宜願諸生勿得私之想復再上故少佐筆端耳勗此良志俾爲史者有以紀述也努力多賀柳宗元白

答韋中立論師道書

二十一日宗元白辱書云欲相師僕道不篤業甚淺近環顧其中未見可師者雖嘗好言論爲文章甚不自是也不意吾子自京師來蠻夷間乃幸見取僕自卜固無取假令有取亦不敢爲人師爲衆人師且不敢況敢爲吾子師乎

孟子稱人之患在好爲人師由魏晉氏以下人益不事師今之世不聞有師有輒譁笑之以爲狂人獨韓愈奮不顧流俗犯笑侮收召後學作師說因抗顏而爲師世果羣怪聚罵指目牽引而增與爲言詞愈以是得狂名居長安炊不暇熟又掣掣而東如是者數矣屈子賦曰邑犬羣吠吠所怪也僕往聞庸蜀之南恒雨少日日出則犬吠余以爲過言前六七年僕來南二年冬幸大雪踰嶺被南越中數州數州之犬皆蒼黃吠噬狂走者累日至無雪乃已然後始信前所聞者今韓愈旣自以爲蜀之日而吾子又欲使吾爲越之雪不以病乎非獨見病亦以病吾子然雪與日豈有過哉顧吠者犬耳度今天下不吠者幾人而誰敢銜

怪於羣目以吾聞取怒乎僕自謫過以來益少志慮居南
中九年增腳氣病漸不喜鬧豈可使嘔嘔屏交者早暮拂
吾耳騷吾心則固僵仆煩憤愈不可過矣平居望外遭齒
舌不少獨欠爲人師耳抑又聞之古者重冠禮將以責成
人之道是聖人所尤用心者數百年來人不復行近有
孫昌允者獨發憤行之既成禮明日造朝至外廷薦笏言
於卿士曰某子冠畢應之者咸憮然京兆尹鄭叔則怫然
曳笏卻立曰何預我耶廷中皆大笑天下不以非鄭尹而
快孫子何哉獨爲所不爲也今之命師者大類此吾子行
厚而辭深凡所作皆恢恢然有古人形貌雖僕敢爲師亦
何所增加也假而以僕年先吾子聞道著書之日不後誠

欲往來言所聞則僕固願悉陳中所得者吾子苟自擇之
取某事去某事則可矣若定是非以教吾子僕材不足而
又畏前所陳者其爲不敢也決矣吾子前所欲見吾文既
悉以陳之非以耀明于子聊欲以觀子氣色誠好惡何如
也今書來言者皆大過吾子誠非佞譽誣諛之徒直見愛
甚故然耳始吾幼且少爲文章以辭爲工及長乃知文者
以明道是固不苟爲炳炳烺烺務采色夸聲音而以爲能
也凡吾所陳皆自謂近道而不知道之果近乎遠乎吾子
好道而可吾文或者其於道不遠矣故吾每爲文章未嘗
敢以輕心掉之懼其剽而不留也未嘗敢以怠心易之懼
其弛而不嚴也未嘗敢以昏氣出之懼其昧沒而雜也未

嘗敢以矜氣作之懼其偃蹇而驕也抑之欲其奧揚之欲其明疎之欲其通廉之欲其節激而發之欲其清固而存之欲其重此吾所以羽翼夫道也本之書以求其質本之詩以求其恒本之禮以求其宜本之春秋以求其斷本之易以求其動此吾所以取道之原也參之穀梁氏以厲其氣參之孟荀以暢其支參之莊老以肆其端參之國語以博其趣參之離騷以致其幽參之太史以著其潔此吾所以旁推交通而以為之文也凡若此者果是耶非耶有取乎抑其無取乎吾子幸觀焉擇焉有餘以告焉苟亟來以廣是道子不有得焉則我得矣又何以師云爾哉取其實而去其名無招越蜀吠怪而為外廷所笑則幸矣宗元復

答貢士元公瑾論仕進書

二十八日宗元白前時所枉文章諷讀累日辱致來簡受賜無量然竊觀足下所以殷勤其文旨者豈非深寡和之憤積無徒之歎懷不能已赴訴于僕乎如僕尙何為者哉且士之求售於有司或以文進或以行達者稱之不患無成足下之文左馮翊崔公先唱之矣秉筆之徒由是增敬足下之行汝南周穎客又先唱之矣逢掖之列亦以加慕夫如是致隆隆之譽不久矣又何戚焉古之道上延乎天下倍乎上下洽通而薦能之功行焉故天子得宜為天子者薦之於天諸侯得宜為諸侯者薦之於王大夫得宜

爲大夫者薦之於君士得宜爲士者薦之於有司薦於天堯舜是也薦於王周公之徒是也薦於君鮑叔牙子罕子皮是也薦於有司而專其美者則僕未之聞也是誠難矣古猶難之而況今乎獨不得與足下偕生中古之間進相援也退相拯也已乃出乎今世雖王林國韓長孺復生不能爲足下抗手而進以取僂笑矧僕之齷齪者哉若將致僕於奔走先後之地而役使之則勉充雅素不敢告憊嗚呼始僕之志學也甚自尊大頗慕古之大有爲者汨沒至今自視缺然知其不盈素望久矣上之不能交誠明達德行延孔子之光燭于後來次之未能勵材能興功力致大康于民垂不滅之聲退乃俛俛於下列咕咕於末位偃仰

驕矜道人短長不亦冒先聖之誅乎固吾不得已耳時勢使然也穀梁子曰心志旣通而名譽不聞友之過也蓋舉知揚善聖人不非況足下有文行唱之者有其人矣繼其聲者吾敢闕焉其餘去就之說則足下觀時而已不悉宗元白

答嚴厚輿論師道書

二十五日某白馮翊嚴生足下得生書言爲師之說怪僕所作師友箴與答韋中立書欲變僕不爲師之志而屈已爲弟子凡僕所爲二文其卒果不異僕之所避者名也所憂者其實也實不可一日忘僕聊歌以爲箴行且求中以益已慄慄不敢暇又不敢自謂有可師乎人者耳若乃名

者方爲薄世笑罵僕脆怯尤不足當也內不足爲外不足當衆口雖懇懇見迫其若吾子何實之要二文中皆是也吾子其詳讀之僕見解不出此吾子所云仲尼之說豈易耶仲尼可學不可爲也學之至斯則仲尼矣未至而欲行仲尼之事若宋襄公好霸而敗國卒中矢而死仲尼豈易言耶馬融鄭元者二子獨章句師耳今世固不少章句師僕幸非其人吾子欲之其有樂而望吾子者矣言道講古窮文辭以爲師則固吾屬事僕才能勇敢不如韓退之故又不爲人師人之所見有同異吾子無以韓責我若曰僕拒千百人又非也僕之所拒拒爲師弟子名而不取當其禮者也若言道講古窮文辭有來問我者吾豈嘗瞋目閉

口邪敬叔吾所信愛今不得見其人又不敢廢其言吾子文甚曷遠恢恢乎其闢大路將疾馳也攻其車肥其馬長其綏調其六轡中道之行大都捨是又奚師歟亟謀於知道者而考諸古師不乏矣幸而亟來終日與吾子言不敢倦不敢愛不敢肆苟去其名全其實以其餘易其不足亦可交以爲師矣如此無世俗累而有益乎已古今未有好道而避是者宗元白

報袁君陳秀才避師名書

秀才足下僕避師名久矣往在京師後學之士到僕門日或數十人僕不敢虛其來意有長必出之有不至必渠切之其教也雖若是當時無師弟子之說其所不樂爲者

非以師爲非弟子爲罪也有兩事故不能自視以爲不足爲一也世久無師弟子決爲之且見非且見罪懼而不爲二也其大說具答韋中立書今以往可觀之秀才貌甚堅辭甚強僕自始覲固奇秀才及見兩文愈益奇雖在京部日數十人到門者誰出秀才右耶前已必秀才可爲成人僕之心固虛矣又何鯤鵬互鄉於尺牘哉秋風益高暑氣益衰可偶居卒談秀才時見咨僕有諸內者不敢愛惜大都文以行爲本在先誠其中其外者當先讀六經次論語孟軻書皆經言左氏國語莊周屈原之辭稍采取之穀梁子太史公甚峻潔可以出入餘書俟文成異日討也其歸在不出孔子此其古人賢士所懍懍者求孔子之道不於

異書秀才志於道慎勿怪勿雜勿務速顯道苟成則勃然爾久則蔚然爾源而流者歲旱不涸蓄穀者不病凶年蓄珠玉者不虞殍死矣然則成而久者其術可見雖孔子在爲秀才計未必過此不具宗元白

答韋珩示韓愈相推以文墨事書

足下所封示退之書云欲推避僕以文墨事且以勵足下若退之之才過僕數人尙不宜推避於僕非其實可知固相假借爲之詞耳退之所敬者司馬遷揚雄遷於退之固相上下若雄者如太元法言及四愁賦退之獨未作耳決作之加恢竒至他文過揚雄遠甚雄文遣言措意頗短局滯澁不若退之猖狂恣睢肆意有所作若然者使雄來尙

不宜推避而況僕耶彼好獎人善以爲不屈己善不可獎故慊慊云爾也足下幸勿信之且足下志氣高好讀南北史書通國朝事穿穴古今後來無能和而僕稚駉卒無所爲但趨趨文墨筆硯淺事今退之不以吾子勵僕而反以僕勵吾子愈非所宜然卒篇欲足下自挫抑合當世事以固當雖僕亦知無出此吾子年甚少知己者如麻不患不顯患道不立耳此僕以自勵亦以佐退之勵足下不宣宗元頓首再拜

答貢士廖有方論文書

三日宗元白得秀才書知欲僕爲序然吾爲文非苟然易也於秀才則吾不敢愛吾在京都時好以文寵後輩由吾

文知名者亦爲不少焉自遭斥逐禁錮益爲輕薄少兒譁囂羣朋增飾無狀當途人率謂僕垢污重厚舉將去而遠之今不自料而序秀才秀才無乃未得嚮時之益而受後事之累去聲吾是以懼潔然盛服而與負塗者處而又何賴焉然觀秀才勤懇意甚久遠不爲頃刻私利欲以就文雅則吾曷敢以讓當爲秀才言之然而無顯出於今之世視不爲流俗所扇動者乃以示之既無以累秀才亦不增僕之詬罵也計無宜於此若果能是則吾之荒言出矣宗元白

答貢士蕭纂求爲師書

十二日宗元白始者負戴經籍退跡草廬塊守蒙陋坐自

擁塞不意足下曲見記憶遠辱書訊去聲以高文開其知去聲思去聲而又超僕以宗師之位貸僕以邱山之號流汗伏地不知逃匿幸過厚也前時獲足下灌鍾城銘竊用唱導於聞人僕常赧然羞其僭踰今覽足下尺牘殷勤備厚似欲僕贊譽者此固所願也詳視所貺曠然以喜是何旨趣之博大詞采之蔚然乎鼓行於秀造之列此其戈矛矣舉以見投爲賜甚大俯用計度不自謂宜顧視何德而克堪哉且又教以耘其蕪穢甚非所宜僕不敢聞也其他唯命宗元白

報崔黯秀才書

崔生足下辱書及文章辭意良高所嚮慕不凡迄誠有意

乎聖人之言然聖人之言期以明道學者務求諸道而遺其辭辭之傳於世者必由於書道假辭而明辭假書而傳要之之道而已耳道之及及乎物而已耳斯取道之內者也今世因貴辭而矜書粉澤以爲工道密以爲能不亦外乎吾子之所言道匪辭而書其所望於僕亦匪辭而書是不亦去及物之道愈以遠乎僕嘗學聖人之道身雖窮志求之不已庶幾可以語於古恨與吾子不同州部閉口無所發明觀吾子文章自秀士可通聖人之說今吾子求於道也外而望於予也愈外是其可惜歟吾且不言是負吾子數千里不棄朽廢者之意故復云爾也凡人好辭工書者皆病癖也吾不幸蚤得二病學道以來日思砭鍼攻熨

卒不能去纏結心腑牢甚願斯須忘之而不克竊嘗自毒
今吾子乃始欽欽思易吾病不亦惑乎斯固有潛塊積瘕
中子之內藏恬而不悟可憐哉其卒與我何異均之二病
書字益下而子之意又益下則子之病又益篤甚矣子癖
於伎也吾嘗見病心腹人有思陷土炭嗜酸醎者不得則
大戚其親愛之者不忍其戚因探而與之觀吾子之意亦
已戚矣吾雖未得親愛吾子然亦重來意之勤有不忍矣
誠欲分吾土炭酸醎吾不敢愛但遠言其證不可也俟面
乃悉陳吾狀未相見且試求良醫爲方已之苟能已大善
則及物之道專而易通若積結既定醫無所能已幸期相
見時吾決分子其嗜嗜者不具宗元白

答吳秀才謝示新文書

某白向得秀才書及文章類前時所辱遠甚多賀多賀秀
才志爲文章又在族父處蚤夜孜孜何畏不日日新又日
新也雖間不奉對苟文益日新則若亟見矣夫觀文章宜
若懸衡然增之銖兩則俯反是則仰無可私者秀才誠欲
令吾俯乎則莫若增重其文今觀秀才所增益者不啻銖
兩吾固伏膺而俯矣愈重則吾俯茲甚秀才其懋焉苟增
而不已則吾首懼至地耳又何聞疎之患乎還答不悉宗
元白

復杜温夫書

二十五日宗元白兩月來三辱生書書皆逾千言意者相

望僕以不對答引譽者然僕誠過也而生與吾文又十卷
噫亦多矣文多而書頻吾不對答而引譽宜可自反而來
徵不肯相見亟拜亟問其得終無辭乎凡生十卷之文吾
已畧觀之矣吾性騃滯多所去甚論安敢懸斷是且非耶
書拒吾必曰周孔安可當也儼人必於其倫生以直躬見
拒宜無所諛道而不幸乃曰周孔吾豈得無駭怪且疑生
悖亂浮誕無所取幅尺以故愈不對答來柳州見一刺史
卽周孔之今而去我道連而謁於潮之二邦又得一周孔
去之京師京師顯人爲文詞立聲名以千數又宜得周孔
千百何吾生胸中擾擾焉多周孔哉吾雖少爲文不能自
雕斲引筆行墨快意累累意盡便止亦何所師法立言狀

物未嘗求過人亦不能明辨生之才致但見生用助字不
當律令唯以此奉答所謂乎歟耶哉夫者疑辭也矣耳焉
也者決辭也今生則一之宜考前聞人所使用與吾言類
且異慎思之則一益也庚桑子言藿蠋音鶴卵者吾取焉
道連而謁於潮其卒可化乎然世之求知音者一遇其人
或爲十數文卽務往京師急日月犯風雨走謁門戶以冀
苟得今生年非甚少而自荆來柳自柳將道連而謁於潮
途遠而深矣則其志果有異乎又狀貌嶷然類丈夫視端
形直心無岐徑其質氣誠可也獨要謹克之爾謹克之則
非吾獨能生勿怨亟之二邦以取法時思吾言非固拒生
者孟子曰余不屑之教誨也者是亦教誨而已矣宗元白

上門下李夷簡相公書

日月使持節柳州諸軍事守柳州刺史柳宗元謹獻書于相公閣下宗元聞有行三塗之艱而墜千仞之下者仰望於道號以求出過之者口干百人皆去而不顧就合哀而顧之者不過攀木俯首深矐太息良久而去耳其卒無可奈何然其人猶望而不止也俄而有若烏獲者持長縷于尋徐而過焉其力足爲也其器足施也號之而不顧顧而曰不能力則其人知必死於大壑矣何也是時不可遇而幸遇焉而又不逮乎已然後知命之窮勢之極其卒呼憤自斃不復望於上矣宗元曩者齒少心銳徑行高步不知道之艱以陷乎大阨窮躓頽墜廢爲孤囚日號而望者十

四年矣其不顧而去與顧而深矐者俱不乏焉然猶仰首伸吭張口而視曰庶幾乎其有異俗之心非常之力當路而垂仁者耶今閣下以仁義正直入居相位宗元實竊拊心自慶以爲獲其所望故敢致其詞以聲其哀若又捨而不顧則知沉埋踏斃無復振矣伏惟動心焉宗元得罪之由致謗之自以閣下之明其知之久矣繁言蔓詞祇益爲黷伏惟念墜者之至窮錫烏獲之餘力舒千尋之縷垂千仞之艱致其不可遇之遇以卒成其幸庶號而望者得畢其誠無使呼憤自斃沒有餘恨則士之死於門下者宜無先焉生之通塞決在此舉無任戰汗隕越之至不宣宗元惶恐再拜

柳文卷之三十四終

柳文卷之三十五

啓

上廣州趙宗儒尚書

某啓某天罰深重餘息苟存沉竄竢罪朝不圖夕伏謁無路不任荒戀之誠伏念宗元初授御史之日尚書與杜司空先賜臨顧光耀里閭下情至今尚增惶惕頃以黨與進退投竄零陵囚繫所迫不得歸奉松楸哀荒窮毒人理所極親故遺忘錯況於他人朝夕之急饘粥難繼宗祀所重不敢死亡偷視累息已逾數月伏以尚書德量宏納義風遠揚收撫之恩始於枯朽敢以餘喘上累深仁伏惟惻然見哀使得存濟悽錯悽荒懇叩顙南望竊以動心於無情

柳文

卷之三十五

一

之地施惠於不報之人古烈尙難況在今日而幸然干冒
決不自疑者蓋以聞風之日久嚮德之誠至振高義於流
俗之外合大度於古人之中獨有望於閣下而已非敢以
尋常祈向之禮當大賢匍匐之仁夙夜忖度果於自卜方
在困辱不敢多言伏紙惶恐不勝戰越謹啓

上西川武元衡相公謝撫問啓

某啓某愚陋狂簡不知周防失於夷途陷在大罪伏匿嶺
下于今七年追念往愆寒心飛魄幸蒙在宥得自循省豈
敢徹聞於廊廟之上見志於樽俎之際以求心於萬一者
哉相公以含宏光大之德廣博淵泉之量不遺垢汚先賜
榮問奉讀流涕以懼以悲屏營舞躍不敢寧處是將收孟

明於三敗責曹沫於一舉俾折茲嶺腳之倫得自拂飾以
黜效命於鞭策之下此誠大君子并容廣覽棄瑕錄用之
道也自顧孱鈍無以克堪祇受大賜豈任負戴精誠之至
惘然如日拜伏無路不勝惶惕輕言威重戰汗交深

謝襄陽李夷簡尙書撫問啓

某啓當州員外司馬李幼清傳示尙書委曲特賜記憶過
蒙存問捧讀喜懼浪音郎然涕流慶幸之深出自望外伏惟
尙書鶚立朝端風行天下入統邦憲出分主憂控此上游
式是南服凡海內奔走之上思欲修容於轅門之外躡履
於油幢之前警之涉蓬瀛登崑閬不可得而進也某負罪
淪伏聲銷跡滅固世俗之所棄親友之所遺敢希大賢曲

見存念是以展轉歔歔晝詠宵興願爲斯役以報恩遇瞻
仰霄漢邈焉無山網羅未解縱羽翼而何施囊檻方堅雖
虎豹其焉往不任踊躍懇戀之至謹奉啓起居輕黷威嚴
倍增戰越

賀趙江陵宗儒辟符載啓

某啓伏聞以武都符載爲記室天下立志之士雜然相顧
繼以歎息知爲善者得其歸嚮流言者有所間執直道之
所行義風之所揚堂堂焉實在荆山之南矣幸甚幸甚夫
以符君之藝術志氣爲時聞人才位未會盤桓固久中間
因緣陷在危邦與時偃仰不廢其道而爲見忌嫉者橫致
唇吻房給事以高節特立明之於朝王吏部以清議自任

辯之於外然猶小人浮議困於交戟凡諸侯之欲得符君
者城聯壤接而惑於騰沸環視相讓莫敢先舉及受署之
日則皆開口垂臂悵望悼悔譬之求珠於海而徑寸先得
則衆皆快然罷去知竒寶之有所歸也嗚呼巧言難明下
流多謗自非大君子出世之氣則何望焉瞻望清風若在
天外無任感激欣躍之至輕瀆陳賀不勝戰越不宣

與邕州李域中丞論陸卓啓

某啓伏以至公之道施恩而不求報獎善而不爲功所以
振宣幽光激勵頽俗誠大君子所蓄積也竊見故招討判
官試右衛胄曹參軍陸卓生稟清操長於吏理累仕所至
必有休聲再舉府曹績用茂著頃以狂賊李元慶劫取留

後擅樹寬徒搆災扇禍期在旦夕一夫見刃莫爲已用而卓以此時特立不懼終窮強暴以寧師人既而不幸嬰疾物故不獲一日趨事以受其職有功未報有善未錄伏承閣下言論之餘每所嗟異優給家屬恩禮特殊行道之人皆所欽伏儻錄其事跡奉一贈官使懷憤之魂知感恩於地下秉志之士思受命於門庭足以勸獎三軍豈止光榮一族伏惟不棄狂瞽特賜裁量幸甚幸甚某與卓未嘗相識敢率愚直以期至公輕黷威嚴伏增戰悚謹啓

謝李中丞啓安撫崔簡

某啓伏見四月六日敕刺史崔簡以前任賊罪決一百長流驩州伏奉去月二十三日牒崔簡家口牒州安存并借

官宅什器差人與驅使伏惟中丞以直清去敗政以惻隱撫窮人罪跡暴著則按之以至公家屬流離則施之以大惠各由其道咸適於中威懷並行仁義齊立繩愆糾繆列郡肅澄清之風匡困資無闔境知噢咻之德凡在巡屬慶懼交深伏見崔簡兒女十人皆柳氏之出簡之所犯首末知之蓋以風毒所加漸成狂易音亦不知畏法坐自抵刑各爲賊賄卒無儲蓄得罪之日百口熬然叫號羸頓不知所赴儻非至仁厚德深加憫恤則流散轉死期在須臾某幸被縲囚久沐恩造至於骨肉又荷哀矜循念始終感懼無地謹勒祇承人沉澹奉啓陳謝下情輕瀆

上湖南李中丞啓

卯文

卷之三十五

四

某啓某嘗讀列子書有言於鄭子陽者曰列禦寇蓋有道之士也居君之地而窮君不好士使之然乎子陽於是以君命輸粟於列子列子不受固常高其志又讀孟子書言諸侯之於士曰使之窮於吾地則賜之賜之亦可受也又怪孟子以希聖之才命代而出不卓然自異以潔白其德取食於諸侯不以爲非斷而言之則列子獨任之士唯一毛之爲憂故遁以自免孟子兼濟之士唯利萬物之爲謀故當而不辭今宗元處則無列子之道出則無孟子之謀窮則去讓而自求至則捧受而無慚斯固爲貪淩苟冒人矣董生曰明明求財利唯恐困乏者庶人之事也是皆詬耻之大者而無所避之何也以爲士則黜辱爲農則斥


遠無伎不可以爲工無賞不可以爲商抱大罪處窮微音以當惡歲而無廩食又不自列於閤下則非所以待君子之意也伏惟覽子陽孟子之說以垂德惠無使惶惶然控于他邦重爲董生所笑則縲囚之幸大矣

上桂州李中丞薦盧遵啓

凡士之當顯寵貴劇則其受賜於人也無德心焉何也彼將曰吾勢能得之是其所出者大而其報也必細居窮厄困辱則感慨捧戴萬萬有加焉是其所出者小而其報也必巨審矣故凡明智之君子務其巨以遺其細則功業光乎當時聲名流乎無窮其所以激之於中者異也若宗元者可謂窮厄困辱者矣世皆背去顛頽曠野獨賴大君子

以明智垂仁問訊如平生光耀因錮若被文繡嗚呼世之知止足者鮮矣既受厚遇則又有不已之求以黷閣下之嚴威然而亦欲出其感慨捧戴而效其巨者伏惟閣下留意裁擇幸甚幸甚伏以外族積德儒厚以爲家風周齊之間兄弟三人咸爲帝者師孝仁之譽高於他門伯舅叔仲咸以孝德通於鬼神爲文士所紀述相國彭城公嘗號于天下名其孝以求其類則其後咸宜碩大光寵以充神明之心今乃彫喪淪落莫有達者豈與善之道無可取耶獨內弟盧遵其行類諸父靜專溫雅好禮而信飾以文墨達於政事今所以聞於閣下者無忤於心無愧於色焉以宗元棄逐枯槁故不求遠仕務顯名而又難乎其進也竊高

閣下之舉賢容衆故願委心焉則施澤於遵過於厚賜小人也遠矣以今日之形勢而不廢其言使遵也有籍名於天官獲祿食以奉養用成其志一舉而有知恩之士二焉可不謂務其巨者乎伏惟試詳擇焉言而無實非其敢逃進退恐懼不知所裁不宣謹啓



柳文卷之三十六

啓

上權德輿補闕温卷啓

補闕執事宗元聞之重遠輕邇賤視貴聽所由古矣切以
 宗元幼不知耻少又躁進拜揖長者自于幼年是以造
 造之末跡厠牒計之下列賈藝求售闕若賜反無善價載文
 筆而都儒林者匪親乃舊率皆攜撫相示談笑見昵啞
 逡巡爲達者嗤無乃覩其樸者鄙其成狎其幼者薄其長
 耶將行不拔異操不砥礪學不該廣文不炳燿實可鄙而
 薄耶今鴛鴦克朝而獨于執事者特以顧下念舊收接儒
 素異乎他人耳敢問厥由庶幾告之俾識去就幸甚幸甚

柳文

卷之三十六

今將慷慨激昂奮攘布衣縱談作者之筵曳裾名卿之門
抵掌峩弁厚自潤澤進越無忍汗達者之視聽狂狷愚妄
固不可爲也復欲俛默惕息疊足揚翼拜祈公侯之闈跪
邀賢達之車竦魂慄股兢恪危懼榮者倦之彌忿厥心又
不可爲也若慎守其常確執厥中固其所矣則又色平氣
柔言訥性魯無特達之節無推擇之行瑣瑣碌碌一孺子
耳孰謂其可進孰謂其可退抑又聞之不鼓踴無以超泥
塗不曲促無以由險艱不守常無以處明分不執中無以
趨夷軌今則鼓踴乎曲促乎守其常而執厥中乎浩不知
其宜矣進退無倚宵不遑寐乃訪于故人而咨度之其人
曰補闕權君著名踰紀行爲人高言爲人信力學揆以切

文時儕稱雄子亟拜之足以發揚對曰衷燕石而履元圃
帶魚目而游漲海祇取誚耳曷予補乎其人曰跡之勤者
情必生焉心之恭者情必報焉況子之文不甚鄙薄者乎
苟或勤以奉之恭以下之則必勗勵爾行輝耀爾能言爲
建旆晨發夕被聲馳而響溢風振而草靡可使尺澤之鯢
奮鱗而縱海密網之鳥舉羽而翔霄子之一名何足就矣
庶爲終身之遇乎曷不舉馳聲之資挈成名之基投之權
君然後退行守常執中之道斯可也愚不敏以爲信然是
以有前日之拜又以爲色取象恭大賢所飫朝造夕謁大
賢所倦性頗疎野竊又不能是以有今茲之間仰惟覽其
鄙心而去就之潔誠齋慮不勝至願謹再拜

上大理崔大卿應制舉啓

古之知己者不待來求而後施德舉能而已其受德者不待成身而後拜賜感知而已故不叩而享不介而合則其舉必至而其感亦甚斯道遁去遼濶于祀何爲乎今之世哉若宗元者智不能經大務斷大事非有恢傑之才學不能探奧義窮章句爲腐爛之儒雖或眞力於文學勤勤懇懇于歲時然而未能極聖人之規矩恢作者之聞見勞費翰墨徒爾拖逢掖曳大帶游於朋齒且有愧色豈有能乎哉閣下何見待之厚也始者自謂抱無用之文戴不肖之容雖振身泥塵仰晞雲霄何由而能哉遂用收視內顧頽首絕望耳以沒沒也今者果不自意他日瑣瑣之著述幸

得流於衽席接在視聽閣下乃謂可以蹈遠大之途及制作之門決然而不疑介然而獨德是何收採之特達而顧念之勤備乎且閣下知其爲人何如哉其貌之美陋質之細大心之賢不肖閣下固未知也而一遇文字志在濟拔斯蓋古之知己者已故曰古之知己者不待來求而後施德者也然則亟來而求者誠下科也宗元向以應博學宏詞之舉會閣下辱臨考第司其升降當此之時意謂運合事并適下厥時其私心曰以自負也無何閣下以鯁鱗之勢不容尺澤悠爾而自放廓然而高邁其不我知者遂排逐而委之委之誠當也使古之知己猶在豈若是求多乎哉夫仕進之路昔者竊聞于師矣太上有專達之能乘時

得君不由乎表著之列而取將相行其政焉其次有文行之美積能累榮不由乎舉甲乙歷科第登乎表著之列顯其名焉又其次則曰吾未嘗舉甲乙也未嘗歷科第也彼朝廷之位吾何脩而可以登之乎必求舉是科也然後得而登之其下不能知其利又不能務其往則曰舉天下而好之吾何爲獨不然由是觀之有愛錐刀者以舉是科爲悅者也有爭尋常者以登乎朝廷爲悅者也有慕權貴之位者以將相爲悅者也有樂行其政者以理天下爲悅者也然則舉甲乙歷科第固爲末而已矣得之不加榮喪之不加憂苟成其名於遠大者何補焉然而至於感知之道則細大一矣成敗亦一矣故曰其受德者不待成身而後

拜賜然則幸成其身者固末節也蓋不知來求之下者不足以及收特達之士而不知成身之末者不足以承賢達之遇審矣伏以閣下德足以儀世才足以輔聖文足以當宗師之位學足以冠儒術之首誠爲賢達之表也顧視下輩豈容易而收哉而宗元樸野昧劣進不知退不可以言乎德不能植志於義而必以文字求達不可以言乎才秉翰執簡敗北而歸不可以言乎文登場應對刺力葛切繆經旨不可以言乎學固非特達之器也忖省陋質豈容易而承之哉叨冒大遇穢累高鑒喜懼交爭不克寧居竊感荀瑩如實出己之德敢希豫讓國士遇我之報伏候門屏敢俟招納謹奉啓以代投刺之禮伏惟以知己之道終撫薦焉

不宣宗元謹啓

上裴晉公度獻唐雅詩啓

宗元啓伏以周漢二宣中興之業歌於大雅載在史官然而申甫作輔方召專淮夷之功魏邴謀睿辛趙致罕羗之績文武所注中外莫同伏惟相公天授皇家聖賢克合謀叶德一以致太平人有申甫魏邴之勤出兼方召辛趙之事東取淮右北服恒陽略不代出功無與讓故天下文士皆願秉筆曠勤思慮以贊述洪烈闡揚大勲宗元雖敗辱斥逐守在蠻裔猶欲振發枯槁決疏潢汙整效蚩鄙少佐毫髮謹撰平淮夷雅二篇恐懼不敢進獻私願徹聲聞于下執事庶宥罪戾以明其心出位僭言惶戰交積無任踊

躍屏營之至不宣宗元謹啓

上襄陽李僕射愬獻唐雅詩啓

宗元啓昔周宣中興得賢臣召虎師出江漢以平淮夷故其詩曰江漢之潁王命召虎其卒章曰于周受命自召祖命以明虎者召公之孫克承其先也今天子中興而得閣下亦出江漢以平淮夷克承于先西平王其事正類然而未有嗣大雅之說以布天下以施後代豈聖唐之文雅獨後於周室哉宗元身雖陷敗而其論者往往不爲世屈意者殆不可自薄自匿以墜斯時苟有輔萬分之一雖死無憾謹撰平淮夷雅二篇齋沐上獻誠醜言淫聲不足以當金石庶繼代洪烈裨官里人得採而歌之不勝憤踊之至

輕瀆威重戰越交深謹啓

上揚州李吉甫相公獻所著文啓

宗元啓始閣下爲尙書郎薦寵下輩士之顯於門闥者以十數而某尙幼不得與於斯役及閣下遭讒妬於外十餘年又不得效薄伎於前以希一字之褒貶公道之行也閣下乃始爲贊書訓辭擅文雅于朝以宗天下而某又以此時去表著之位受放逐之罰薦仍囚錮視日請命進退違背思欲一日伏在門下而不可得常恐抱斯志以沒卒無以知於門下冥冥常懷魂魄幽憤故敢及其能言貢書編文冒昧嚴威以畢其志伏惟觀覽焉幸甚幸甚閣下相天子致太平用之郊報則天神降地祇出用之經邦則百貨

殖萬物成用之文教則經術興行用之武事則暴亂翦滅依倚而冒榮者盡去幽隱而懷道者畢出然後中分主憂以臨東諸侯而天下無患盛德大業光明如此而又有周公接下之道斯宗元所以廢銅濱死而猶欲致其志焉閣下倘以一言而揚舉之則畢命荒裔固不恨矣謹以雜文十首上獻縲囚而干丞相大罪也寧爲有聞而死不爲無聞而生去就乖野不勝大懼謹啓

謝李吉甫相公示手札啓

宗元啓六月二十九日衡州刺史呂溫道過永州辱示相公手札省錄狂瞽收撫羈縲沐以含宏之仁忘其進越之罪感深益懼喜極增悲五情交戰不知所措宗元質性庸

塞行能無取著書每成於廢疾進德且乏其馨香常願操
筆醫門掬溜蘭室良辰不與夙志多違昨者踊躍殘魂奮
揚蓄念激以死灰之氣陳其樊箒之詞致之煙霄分絕流
眄今則垂露在手清風入懷華袞濫褻於赭衣龍門俯收
於培井藻鏡洞開而秋毫在照文津傍暢而寒谷生輝化
幽鬱之志若覲清明換兢危之心如承撫薦非常之幸豈
獨此生伏以淮海劇九天之遙瀟湘參百越之俗傾心積
念長懸星漢之上流形委骨永淪魑魅之羣何以報恩唯
當結草無任喜懼感戀之至

上江陵趙相公寄所著文啓

宗元啓宗元往者嘗侍坐於崔比部聞其言曰今之爲文

莫有居趙司勳右者自是恒欲飾其所論著薦之閣下病
其未就將進且退者殆十數焉幸以廢逐伏匿獲伸其業
類於向者若有可觀然又以罪惡顯大其死荒野不能出
其固陋以求知於閣下則固昧昧徒生於世矣謹獻雜文
十首倘還以數字定其是非使得存於世則雖生與蠻夷
居魂與魑魅游所不辭也輕瀆威重伏增惶灼謹啓

上嚴東川寄劍門銘啓

宗元伏惟僕射以仁厚蓄生人以勇義平國難而劍門用
兵之事最爲天下唱首取其險固爲我要衝王師得以由
其門而入仿佯布濩遂無留滯是閣下之勲力宜著於萬
祀而不已也宗元負罪俟命晷刻觀望道里深遠不得悉

間當時之聲然而竊以累受顧念踴躍盛德恐沒身炎
瘴卒無以少報於閤下是以晝夜恟恟不克自寧今身雖
敗棄廢幾其文猶或傳於世又焉知非因閤下之功烈所
以爲不朽之一端也敢默然而已乎謹撰劍門銘一首惶
恐獻上誠無以稱宏大之略亦足以發平生之心不勝慚
懼戰越之至

上江陵嚴司空獻所著文啓

宗元啓伏念往歲司空由尚書郎出貳太原宗元獲於天
長專用候謁伏蒙叙以世舊許造門闢自後司空累膺寵
榮位極公輔宗元得罪朝列竄身湘南霄漢益高泥塵永
棄瞻仰遼絕陳露無由司空統臨舊荆控制南服道路非

遠德化所覃是敢奮起幽淪仰希光耀伏惟憫伶孤賤特
肆撫存則縲紲之辱有望蠲除嗚吠之能猶希效用謹獻
雜文七首伏惟以一字定其褒貶終身之幸無以加焉上
瀆威嚴伏增戰越

上嶺南鄭相公所著文啓

宗元啓伏見與當州韋使君書猥賜存問驚忤悼懼交動
於中循念竟日若無容措幸甚幸甚宗元素乏智能復闕
周慎一自得罪八年于今兢愧弔影追咎旣往自以終身
沈廢無跡自明不意相國垂愍特記名姓守突一叫奧者
忽仰晞於白日負泥塗者遂自濯於清源快心暢目不知
所喻伏以聖人之道與其進也不保其往故敢藻飾文字

洗滌心神致之門下祇俟嚴命伏惟收撫獎勵以成其終
謹獻雜文三十六首旨昧上瀆無任跼躍惶恐之至

上李中丞所著文啓

宗元啓宗元無異能獨好爲文章始用此以進終用此以
退今者畏罪悔咎伏匿惴慄猶未能去之時時舉首長吟
哀歌舒泄幽鬱因取筆以書初章而編略成數卷伏念閣
下以文章昇大僚統方隅而宗元幸緣罪辜得與編人齒
於部內不以此時露其所爲以希大君子顧視則爲陋劣
而自棄也敢飾近文及在京師官命所草者凡三卷合四
十三首不敢繁故也倘或以爲有可采者當繕錄其餘以
增几席之污去就鄙野伏用兢惶謹啓

上裴行立中丞撰訾家洲記啓

右伏奉處分令撰訾家洲亭記伏以境之殊尤者必待才
之絕妙以極其詞今是亭之勝甲於天下而猥顧鄙陋使
爲之記伏受嚴命不敢回讓退自揣度惕然汗流累奉游
宴切觀物象涉旬模擬不得萬一竊伏詳忖進退若墜久
稽篆刻則有違慢之辜速課空薄又見疎蕪之累憊與憊同
期廢事尤所戰慄謹脩撰訖上獻退自跼躄不知所裁無
任隕越惶恐之至

上河陽烏尚書重允欲獻文啓

宗元啓伏以尚書以碩德偉才代著勳烈兩河定亂三城
建功鼎彝竹帛未足云紀進臨汝上控制東方隱然長城

柳文卷之三十六
朝野倚賴宗元雖屏棄遐壤而飽聞德聲所恨不獲親執
鞭弭以備戎伍夙夜踴躍不克寧居伏以威稜所加狂狡
已震莫大之績重復增崇小子久以文字進身嘗好古人
事業專當具筆札拂縑緗贊揚大功垂之不朽瞻望霄漢
戀慕交深冒瀆威嚴伏增戰越

柳文卷之三十六終

柳文卷之三十七

表

禮部爲百官上尊號表

臣某言伏以聖王之纂承天位也臣子必竭懇誠獻尊號
安敢爲佞禮在其中一則以告天地神祇二則以奉宗廟
社稷三則以安華夏蠻貊巍巍大稱其可廢乎臣等誠歡
誠望頓首頓首伏惟皇帝陛下叶周文之孝德齊大禹之
約身宏帝堯之法天過殷湯之解網未逾周月四海將致
於時雍甫及元正率土更欣於再造然神人之願億兆之
情有所不安率謂未盡善者以爲帝德廣運而尊號猶闕
郊廟備禮而祝嘏無辭凡百兢懷華夷屬望臣謹按昔皋

柳文

卷之三十七

陶之頌舜伊尹之頌湯皆臣子至公面揚君父以敷於當代以播於無窮夫豈飾哉幸由事實帝王尊號蓋漸於此皇家光被四表祖宗列文時當太和尊號表德耳目所接簡牘斯存稽之於前典則如彼考之於聖朝又如此今龜筮習吉元正戒期當品物惟新之時乃皇天大禮之日陛下郊天地饗宗祧陰陽協和動植交暢不建至尊之號恐違列聖之心所以臣等冒死陳聞請上徽號伏惟陛下小謙讓之節安延企之情特詔名儒禮官百寮庶尹詳明故實議崇聖德則人望允厭神心獲安山川效靈光贊無疆之壽祝史陳言永彰不朽之功臣等蒙國寵榮備位班列無任懇望之至

第二表

臣某等言臣等再陳丹懇請獻鴻名天心未從隕越無措臣某誠惶誠恐頓首頓首謹按堯曰咨爾舜舜曰格爾禹湯曰吾自甚武自號曰武王則堯舜禹湯皆當時王者之號也考皇帝之故實徵往聖之憲章允協禮經煥乎圖牒伏惟皇帝陛下允恭克讓約已謙尊參天兩地之功爲而不有安上理人之德置而不論至心王言非羣下所仰望也然臣等無以爲尊號者所以類上帝饗祖宗萬人所稱百蠻所仰表聖德於率土播天聲於無疆臣下請之之謂禮帝王承之之謂孝孝大於讓禮先於謙百王不刊之典安可得而廢也臣等又以春秋本於五始元者一歲之首

春者四時之首王者受命之首正月者政教之首郊天大禮者立極之首今天地交泰俯臨元辰正始之美正當其運陛下確違羣願固守謙冲此臣等所以兢惕失圖惴惶無措上冒嚴憲敢逃厚責伏乞俯垂天聽察納微誠詔禮官議臣所請揆日推禮虔奉鴻休盡敬於此猶恐天光未照三獻無徵彷徨闕庭伏待斧鑕無任聳望之至

禮部賀冊尊號表

臣某伏奉月日制陛下膺受尊號率土臣子慶抃無窮臣聞立極之大四海無以報神功配天之尊萬物不能崇聖德唯有徽號是彰中興所以上探天心下極人欲伏惟元和聖文神武法天應道皇帝陛下統承千載光被六幽蟲

賊盡除福應皆集有首有趾咸識太平勲臣增爵祿之榮戎士加賞延之寵片善必錄微功盡昇獨惟聖謨事絕酬答萬國歛望百工怨思是以啓元和之盛典延昊穹之景祚理歷凝命寔曰聖文利眾定功時惟神武運行有法天之用變化乃應道之方鬼神協謀夷夏同志大禮既建鴻恩遂行歡呼遠市於九圍滲漉普周於八裔慶超遂古美冠將來臣獲守蠻荒遠承大典潢汚比陋河清幸遂於千年塵壤均微山呼願同於萬歲無任慶賀屏營之至

爲京兆府請復尊號表三首

臣某言某月日諸縣耆老某等若干人詣臣陳狀辭意迫切以陛下尊號未復請詣闕上表者人心已鬱安可久違

天意實勤諒難固拒撫然感悅深契微誠臣某誠懇誠迫頓首頓首伏惟皇帝陛下聖神之功貫於天地文武之道超乎古今盛德愈大而謙光益深玄化已成而徽號未復遂使神祇歛望人庶怨思沐浴鴻澤者敢懷晷刻之安捧戴皇恩者不知寢食之適負愧懷憤萬方一心日日以冀遂掩星歲況今地不愛寶致百穀之豐穰天惟降衷呈眾瑞而繁委汚萊瘠鹵之地混成大田草木蟲獸之微化爲神貺萬靈垂鑒昭然甚明此而不從臣所太惑矧又兵戎永戢夷狄咸懷昭然長春樂以終日是以耆老等深感聖育踴躍不寧上奉天恩踴躍知懼頓顙闕下願復鴻名不謀而同無期而至此皆上玄幽贊以誘其衷列聖垂靈以

悟其意臣以爲陛下當敬于斯旨不可忽也臣又伏以陛下賞功與能舉賢出滯小言不廢片善是褒豈可使臣子之效雖微而必旌君父之德盡美而無稱凡在覆載不勝懇倒恐懼之至謹封耆老等狀奉表昧死陳請以聞謹言

第二表

第三表

臣某言臣伏以耆老等並發丹誠將貫白日請復徽號以光聖謨臣以其懇款自中不可禁止遂抗表陳請備述微誠伏奉墨詔批答未蒙允許者衆心尚阻天意未從懇迫逾深戰惶無措臣某伏惟皇帝陛下道大益謙化成彌損雖江海善下每應朝宗之心而日月居高久稱照臨之位

況復上承天命下覩人誠若然辭之理有不可伏以陛下
功參造化政體乾坤萬邦宅心百靈效職此聖之至也明
並兩曜信如四時先天不違窮神知化此神之極也道德
純被禮樂興行宸翰動于三光睿藻窮于六義此文之備
也五兵不試七德咸宣殊方者知歸負固者率服此武之
成也黃龍皓兔甘露慶雲神禾嘉瓜祥蓮瑞木萬物暢遂
百穀茂滋此天之至靈也黎老班白伏守闕庭鰥嫠童幼
謠歌道路此人之至誠也有其德而無其號拒乎天而違
乎人雖陛下謙讓之至美抑非臣心之所安也伏以賤志
難明微誠莫達戴天彌懼履地益慚不任懇迫屏營之至
伏願早建大號以稱天人之心謹再奉表昧死陳請以聞

爲耆老等請復尊號表二首

京兆府長安縣耆老臣某等言臣伏以陛下尊號未復一
十九年盛德彌光大化益被加以休徵咸集福應具臻至
於今歲紛綸尤盛風雨必順生長以時五稼盡登萬方皆
稔神意人事正在於斯天不可違時不可棄臣等誠懇誠
迫頓首頓首臣聞恩深必報德盛必崇以陛下九重之尊
推崇無上以陛下四海之大報效何施唯有尊名用光聖
理闕然未復誰所敢安臣心則微天意甚重伏惟皇帝陛
下體昊穹以施化虔上帝以致誠今卽于祥應期百神奉
職飛走之物皆已效靈草木之類咸能應聖天命降於上
人誠發於中此而可辭孰云有奉況復野多滯穗畝有餘

糧足食之慶充溢於京垣阜財之謠歡呼於道路盡非人力皆是天成神祇之望既勤遐邇之心又迫況臣等得生邦甸幸遇盛明身體髮膚盡歸於聖育衣服飲食悉自於皇恩被元化而益深望鴻名而未覩懇倒之至夙夜不寧謹詣光順門昧死請復聖神文武之號以副天地宗社之心使海內赤子得安其所臣等不勝懇倒迫切之至

第二表

京兆府長安縣耆老臣石靈等言伏奉墨詔批臣所請復尊號未蒙允許者捧對惶遽不知所裁天實命之於臣何有臣等誠懇誠懼頓首頓首臣聞聖君以奉天爲心不可執謙爲德以順人爲大不以崇讓爲優今陛下深拒天人

之誠猶懷謙讓之道臣等愚惑未知所歸且百祥薦臻特表昊穹之睠五穀蕃熟用彰后土之勤億兆嗷嗷願天請命上下交應幽明同心舉而違之臣所未識況臣等共被仁育同臻大和陛下德達上元以豐人之衣食道躋壽域以延臣之歲年沐浴皇風二十餘載兒童感化鰥寡知恩故臣等出鄉之時歡呼遍野閭里勉臣以不進不止妻孥誓臣以不遂不歸唯竭血誠退無面目便當殞首闕下終不徒還伏惟陛下照臣懇迫之情哀臣羸老之命臣等不勝嗚咽慚恨之至謹奉表陳謝以聞

禮部爲文武百寮請聽政表三首

臣某等言臣聞大道必體於至公大孝莫高於善繼上觀

列聖旁考前王罔不俯就禮文仰承大事嚴奉宗廟慰安
元元然後德政惟新邦家永固伏惟皇帝陛下寢苫泣血
號慕無時貫于神明動于天地未臨度政猶狗至誠凡在
人臣孰不哀懼伏惟先聖遺旨俾陛下抑哀而聽政本朝
之人使臣等竭忠以奉上非敢懼死輒布懇詞期於必從
以慰寰宇且王業至重軍國方殷一日萬機不可暫闕伏
願追尊顧命蹈履成規恢王者華夷之望順上帝乃眷之
懷臣等不勝哀迫誠懇之至

第二表

伏奉大行皇帝知陛下至性自天恐陛下執哀過毀上惟
九廟之重下念萬務之殷故遺詔丁寧俾遵舊典今百辟
卿士駟然在庭瞻望清光已七日矣固陳誠請猶未允從
內外憂惶莫知所出臣聞大孝之本繼志爲難酌禮之情
得中爲貴是以哀迷期數哭泣有常俯而就之聖人所重
知難繼也君子不爲伏願少抑哀懷仰遵理命以副神祇
之望以安億兆之心光祖業於無窮流德化於天下凡在
臣子孰不悲戴

又第二表

臣某等言臣聞聖凡殊塗邦家異禮故王者捨已從物用
身許天雖居達喪猶以事奪伏以大行皇帝道成鑄鼎僊
等御龍萬姓長號聲九有願望陛下以聰明睿聖嗣守寶
圖爰及宅憂道滋累日而孝思罔極尙輟乃雍之言庶政

未登頗闕如絲之命臣等嘗覽載籍粗知喪紀若成周顧
命歷代猶遵西漢詔音前王所奉我國家以孝理天下文
明應期上用此法胥以傳授蓋事歸至當則不可不遵禮
貴從宜則不得不守理固然也臣等是以上陳愚懇輕瀆
宸嚴冀遂血誠俯親國政而陛下執喪逾切聽理未聞億
兆嗷嗷不知所訴臣以爲天子之孝在於保安社稷司牧
蒸黎功超百王慶流萬代亦何必守臣下之小節蔑皇王
之大猷固阻羣情務成謙德伏願以遺詔爲念奪在疚之
懷就臨軒之制天下幸甚

第三表

伏以萬機至重遺旨難違再獻表章上塵旒宸精誠徒竭

天意未迴內外遑遑人神企望臣聞王者之孝異於匹夫
禮不相沿道資適變當承平之代故殷帝宅憂而不言遇
有事之時則周王未葬而誓衆況今戎車猶駕邊候多虞
兩河之寇盜難除百姓之瘡痍未合亂者思理危者求安
天下嗷嗷正在今日誠宜抑其至性以副羣心成先帝之
大功繼中興之盛業豈可寢苦啜泣廢政闕然九廟之靈
何報萬方之望何塞臣等職參樞近誠切邦家若陛下未
忍臨軒尙持前志臣等有死而已不敢奉詔不勝哀迫懇
切之至

賀踐阼表

臣某言太子中舍嚴公弼至奉某月日敕書慰諭伏承陛

下以某月日虔奉興冊允昇寶位凡在羣生孰不慶幸臣某誠歡誠抃頓首頓首臣聞天地泰而聖人出雷雨解而品物榮是以五行迭用木火更其位十葉重光宗廟輔其德殷宗龔默再開成湯之業漢文聰明克承高祖之緒陛下重離出曜體乾繼統主鬯彰孝恭之美撫軍著神武之功欽承遺訓永保鴻業遏密之中施雨露以被物遐邇之地覩日月之繼明則四維之外入極之表人神胥悅草木皆春煦嫗生成不失覆載况臣謬膺藩守累受國恩爰自出身洎乎領鎖沐浴聖澤優游昌時不獲覩闕庭之禮展臣庶之分戴天賀聖倍萬恒情

禮部賀改永貞元年表

臣某等言伏奉今日詔今月九日冊皇帝改貞元二十一年爲永貞元年自貞元二十一年八月五日昧爽以前應犯死罪特降從流流已下遞降一等者實命方始聖曆周彰載宣臨照之明遂施渙汗之澤臣某等誠慶誠賀頓首頓首伏以重光下濟積慶旁行漢祖推奉教之尊文王遂無憂之志正名紀歷表運行於萬古宥過輕刑流汪濊於四海歡呼抃蹈遐邇攸同臣某等親奉訓謨仰承大化踴躍之至倍萬恒情無任蹈舞欣慶之至

禮部太上皇詔宜令皇帝卽位賀表

臣某等言伏奉今日太上皇制命陛下卽皇帝位光奉寶圖丕承鴻業溥天幸土慶躍難勝臣某等誠喜誠抃頓首

頓首臣聞皇建其極存諸大訓帝出于震著在易經繼明以照于四方重熙以臨于萬國動植品彙永賴昭蘇山川鬼神咸用欣戴臣某等獲備班列親仰聖明踴躍之誠倍萬恒品無任抃躍喜慶之至

禮部賀立皇太子表

臣某等言伏奉今月二十四日制廣陵郡王宜冊爲皇太子改名某仍令所司擇日備禮冊命者天序有奉皇圖載寧臣某等誠慶誠賀頓首頓首臣聞商書載以貞之文漢史傳早建之議不惟立愛其在繼明陛下奉率前規敷揚盛典顧茲守器之重爰正承華之位尊義方之教載錫嘉名崇建樹之禮式光典命以長而立自符于慎擇必子之

選遂合于至公邦本不搖王業彌固此皆宗社垂祉啓祐皇心乾坤合謀保安聖運足以播休氣於四海洽大和於萬靈食毛含齒所同歡慶臣等奉承制命蹈舞周行踴躍之誠倍百恒品無任慶抃感悅之至

禮部賀皇太子冊禮畢德音表

臣某等言伏奉今日制皇太子冊禮云畢思與萬方同其惠澤者盛典斯舉鴻恩遂行凡在率土不勝抃躍臣某等誠喜誠賀頓首頓首伏惟皇帝陛下克奉神休以正邦統建天下之本宗廟以安致萬國之貞兆人攸賴典冊既備慶澤載流既廣愛而推恩亦好生而布德緩刑而囹圄知感進勳而嗣續增榮崇教諭之方忠良是舉嚴贊襄之禮

賜與有加旌孝悌以厚於人倫敬鬼神而脩其祀事況行禮之日則屏翳收蹟太陽宣精用彰出震之休更表重離之曜神化旁暢皇風遠揚自華及夷異俗同慶臣某等謬參著定倍百恒情無任歡慶踴躍之至

爲王京兆皇帝卽位禮畢賀表

臣某等言臣聞大人繼明百神所以受職天子有道萬國由是承風伏以皇帝陛下纘聖垂休順時御極負辰而會朝夷夏踐阼而統和天人幽明感通遐邇昭泰遂使祥光下燭嘉氣旁通周王謝流火之符魯史愧書雲之典食毛含齒歡抃無窮臣某等幸覩昌時獲奉大慶踴躍之至倍萬常情無任踴躍欣躍之至

代韋中丞賀元和大赦表

臣某言伏奉正月二日制大赦天下永貞二年宜改元元誠賀頓首頓首伏惟皇帝陛下仁化旁流孝理宏闡紀元示布和之令肆眚見恤人之心曠然滌瑕得以遷善渙發大號申明舊章農有薄征市無彊買勲勤是錄爵秩以班寵寧間於幽明澤必周於夷夏近甸輕摧酷之入遠人忘水旱之災旣行慶於官寮亦推恩於天屬諸生喜黌塾之廣庶老加絮帛之優量入所以備凶興廉期於變俗爰褒有容尊賢之典惟新載奉素王宗予之道斯在綸言一降庶政畢行懷生之倫感悅無量臣某等守在遐遠親奉詔

條踊躍之誠倍百恒品無任感恩抃舞屏營之至

禮部賀册太上皇后賀表

臣某等言伏奉今日詔良娣王氏册太上皇后良媛董氏册太上皇德妃宜令所司備禮册命者母儀有光坤道克順陰教方行於萬國內理克和於六宮臣某等誠慶誠賀頓首頓首伏惟皇帝陛下對若天休奉揚睿旨長秋既登其正位禴音狄亦被於恩光奉養見三朝之安周旋有四星之輔豈獨配乾稱大助日爲明所以表王化之源知孝悌之本冠映千古儀刑四方臣某等捧戴施行踊躍無地無任蹈舞欣喜之至

禮部賀太上皇后册畢賀表

臣某等言今日太上皇后册禮云畢率土臣妾慶抃無窮臣某等誠慶誠賀頓首頓首伏以太上皇后著虞嬪之至德嗣周母之徽音表率六宮明彰萬國陛下克脩理本以暢化源神道知事地之方人倫識尊親之大豈惟婦順斯備陰禮用脩其以播正始於王風致時雍於帝典臣某等謬塵榮位獲覩盛儀踊躍之誠倍百恒品

賀皇太子牋

某言伏奉月日制書殿下祗膺茂典位副青宮溫文光三善之名繼照協重離之慶萬葉固本羣方宅心含生之徒孰不欣戴况某夙蒙期獎職在藩方歡抃之誠倍萬恒品

御史臺賀嘉禾表

臣某言今日宰臣以幽州所進嘉禾圖各一軸示百寮者伏以嘉穀順成靈貺昭格天人合應遐邇同風臣某誠歡誠慶頓首頓首伏惟皇帝陛下睿謀廣運神化旁行植物知仁祥圖應聖靈嶽不愆於贊祐燕谷用遂於生成豐稔既均知朔南之被澤休嘉克叶見天地之同和六穗漸稱於漢臣異畝耻書於周典自中形外均慶同歡臣某謬職憲司獲覩休瑞無任抃躍之至

禮部賀嘉禾及芝草表

臣某等言伏見今月某日內出劍南所進嘉禾圖及陝州所進紫芝草示百寮者珍圖煥開瑞彩交映遐邇偕至福應攸同臣某等誠慶誠賀頓首頓首伏惟皇帝陛下緝熙

至道保合太和天惟發祥地不愛寶嘉禾擢質靈草抽英獻于王庭唐叔慚同穎之異薦諸郊廟班史謝連葉之奇既呈疑疑之祥更覩煌煌之秀豐年斯著聖壽用彰飲和之人歡抃無極臣某等優游至化披翫殊姿慶抃之誠倍百恒品

京兆府賀嘉瓜白兔連理棠樹等表

臣某言今日日中使王自寧出徐州刺史張愔所進嘉瓜圖及白兔兒一並出陳許等州觀察使上官說所進許州連理棠樹圖示百寮者惟天眷命是降百祥惟聖欽承用膺多福臣某誠慶誠賀頓首頓首臣伏以大和所蒸至德斯應圖物獻瑞周於遠方神瓜合形式表綿綿之慶異棠

連寶用彰煜煜之榮況金風發祥白兔來擾告有秋之嘉
應著成歲於神功雜大令切紛綸如山斯委人盡登於壽
域物咸暢於薰風況臣特感深恩欣逢眾瑞踴躍之至倍
萬恒情

禮部賀甘露表

臣某言中使王自寧至伏奉宣聖旨出延和殿前丁香樹
甘露一大合示宰臣未時又出一大合令明日示百寮耳
露見降未止者元化升聞靈貺昭答必呈尤異之應以告
天地之和臣某誠歡誠慶頓首頓首伏惟皇帝陛下均煦
育之功敷滂澍之澤大和潛達闕瑞克彰發於天霄特降
宮樹朝光初燭方湛湛而不晞畏景轉炎更濼濼而未已

綴葉而珠璣積耀盈器而冰玉呈姿芳襲椒蘭味兼飴醴
然則零於庭而著異紀於年以標竒徒矜往辰孰並茲日
況樹有丁香之珍殿即延和之號所以著芳風之遠播期
聖壽於無疆事絕古今慶傳遐邇臣謬承渥澤獲覩殊祥
抃躍之誠倍萬恒品

禮部賀白龍并青蓮花合歡蓮子黃瓜等表

臣某言伏見今月日內出滄洲所進白龍見圖又出西內
定禮池中青蓮花并神龍寺前合歡蓮子示百寮二十三
日又出鹽州所進合歡黃瓜圖者二氣交泰萬國同和動
植思協於殊祥遐邇畢陳其嘉應披圖按牒聖理彰明臣
誠歡誠慶頓首頓首伏以天地非遠睿感必通疊瑞重祥

累集宮禁池蓮表異靈化非常敷彼清光徵佛書而尤絕
成其嘉實驗祥經而甚稀積慶芳流自中徂外遂使龍騰
白質秉秋果應於金行瓜合黃中表聖更彰於土德遠通
邊徼近出苑園合慶同歡周於億兆況復邦畿之內雨霽
必時宿麥大穰嘉穀滋茂和風孕育靈氣陶蒸是皆發自
帝心達於天意周流升降成此歲功惠彼羣生自爲嘉瑞
臣某深惟多幸獲遇斯時觀靈貺之備臻知人和之溥洽
無任慶抃躍蹈之至

禮部賀白鵲表

臣某言伏奉進旨宣示前件白鵲者霜毛皎潔玉羽鮮明
色質殊常性惟馴狎臣聞聖王之德無所不至有感則應

無幽不通伏惟陛下恩霑動植仁洽飛翔故得茲禽呈休
效質伏以白者正色式表金方鵲以知來式彰冠服用符
歸化之兆克耀太平之階臣職參禁垣獲覩嘉瑞無任慶
抃之至

禮部賀嘉瓜表

臣某等今日內出浙東觀察使賈全所進越州山陰縣移
風鄉百姓王獻朝園內產嘉瓜二實同蒂圖示百寮者寶
祚惟新嘉瑞來應式彰聖德更表天心臣某等誠慶誠賀
頓首頓首伏惟皇帝陛下保合大和緝熙庶類德馨上達
神化旁行嘉瓜發祥來自侯服質惟同蒂見車書之永均
地則移風知化育之方始雖七月而食豳土歌王業之難

五色稱珍東陵詠佳賓之會未聞感通若斯昭著者也臣某等遭逢聖運親仰珍圖抃躍之誠倍百恆品無任慶悅之至

爲王京兆賀嘉蓮表

臣某言今日某時中使某奉宣聖旨出西內神龍寺前水渠內合歡蓮花圖一軸示百寮者祥圖煥開異彩交映贊天地之合德表神人以同歡臣某誠歡誠慶頓首頓首伏惟皇帝陛下道協重華慶傳種德陶陰陽之粹美孕造化之精英吉慶每見於天心發祥必自於禁掖是使雙華擢秀連蒂垂芳香激大王之風影耀天泉之水煥開宮沼旁映給園靈貺應期天龍護聖寶曆瓊超於小劫神功允洽

於大千臣某獲覩昇平濫居榮寵聞瑞應而稱慶仰績事而增歡無任抃蹈喜躍之至

爲王京兆賀雨表

臣某言臣昨日面奉進旨以近日少雨今月內無雨即須祈禱今日便降甘雨者天且不違神必有據密雲與綸言繼發時雨將天澤並流臣某誠歡誠慶頓首頓首伏惟皇帝陛下憂切蒸黎慮深稼穡思彼未兆防於無形滲漉每出於湛恩變化必隨於廣運宸衷暫惕已矯御天之龍聖謨旣宣遂洽漏泉之澤從感切霽徒對切周布霏微四施黍稷盡成公私皆及野夫鼓舞知帝力之元通官吏歡呼見天心之默喻臣某牧人京邑動仰皇靈渥澤徒加涓滴無

助無任感悅屏榮之至

王京兆賀雨表二

臣某言臣伏見今月二十四日時雨溥降伏以聖心積念天意遽迴移造化之元功革陰陽之常數臣某誠慶誠抃頓首頓首皇帝陛下仁育蒼生恩同赤子自頃天雨未降時稼或愆貶食齋戒至誠幽達又慮宿麥無備播種失時出於宸衷特令賑貸睿謨潛運甘雨遂周布濩垂陰隨聖澤而俱遠滂沱積潤與恩波而共深臣某才術無聞謬司邦甸生成必資於帝力進退何補於天工沐浴大和慙荷無極無任慶躍屏營之至

王京兆賀雨表三

臣某言今月十三日面奉進旨緣自春來少雨宜即差官精誠祈禱者十四日臣便差官分赴靈跡其日雲陰四合至十五日甘雨遂降伏惟皇帝陛下言爲神化動合天心未成早嘆之虞已積幽勤之慮眾靈受職蒼蔚且躋於南山百穀仰聲榮滂霈遂霑於東作睿謨朝降膏澤夕周知天人之已交識陰陽之不測然則周王徒勤於方社殷帝虛美於桑林豈若無災而早圖未禱而先應化超前聖道貫重元徧野同歡頌都相慶臣之欣躍倍萬恒情

王京兆賀雨表四

臣某言臣於三月二十九日奉進旨於諸靈跡處祈雨至三十日甘雨遂降者臣聞惟聖有作先天不違發令而祥

柳文卷之三十七
風已興致誠而元液旋被臣某誠欣誠賀頓首頓首伏惟
皇帝陛下側身防患道邁周王盡力勤人功超夏后聖謨
廣運驅百靈以從風神化旁行滋五稼而流澤油雲四合
膏雨溥周農壤遂一於肥磽滲漉盡霑於遐邇蒸黎詠德
知必自於聖心草木欣榮如有感於皇化有年之慶實在
於斯臣以無能謬領京邑上勞宸慮運此歲功無任喜懼
屏營之至

賀親自祈雨有應表五

臣某言臣得上都院官金部員外郎韓述狀報以時雨未
降親自於龍堂祈禱有靈禽羣翔自成行列如隨威鳳以
翼龍舟其日降雨者伏以時或僖陽歲之常候式當聖日

無害豐年陛下敦本務農憂人閔雨宸慮所至天心自通
故得瑞鳥迎舟掩商羊之舞僊雲覆水協從龍之徵初泛
灑於上宮遂滂濡於率土自中徂外皆荷生成雨公及私
靡不碩茂殷后徒勤於自翦周公空媿於舞雩臣以庸虛
謬司垣翰有年之慶惟聖之功臣某不任云云

柳文卷之三十八

表

爲裴中丞賀克東平赦表

臣某言伏奉月日德音以淄青蕩平褒功宥罪布告遐邇者臣聞肅殺之後每致陽和雷霆既施必聞膏澤伏惟陛下體乾剛以運行叶坤元之翕闢百靈受職六合從風阻兵怙亂者必就梟擒懷忠抱義者無不甄錄激其效順特加旄節之榮寵以元功遂兼鼎鉉之任戎行窮賞賚之重死事極褒卹之憂劫脅之役盡除聚斂之名皆去傷痍受煦老疾加恩豐財已復其征徭賜種更盈於種稔嚴山川之祀神必有依申義烈之家物無不感周王推忠厚之化

柳文

卷之三十八

一

漢帝慙愷悌之風太平之德斯爲至盛然則虞巡可復告
成將慶於岱宗漢典方行講禮再榮於闕里臣謬膺重寄
獲觀大和扑蹈之誠倍萬恒品謹已施行郡邑宣示軍戎
莫不動地歡呼若醉千鍾之酒騰天鼓舞如聞九奏之音
無任慶賀踴躍之至

柳州賀破東平表

臣某言卽日被觀察使牒李師道以月日克就梟戮者帝
德廣運唐命惟新靈贖廓清天地貞觀率土臣庶慶抃無
涯伏惟睿文聖武皇帝陛下威使百神德消六沴天降寶
運時歸太平白克夏擒吳翦蜀平蔡殊類稽顙羣疑革心
唯此兇妖尙聞悖慢庭議旣得廟謀必臧旌旗燭耀於洪

河金鼓震驚於靈岳郟城自潰寧同昔魯之爭齊地悉平
無俟耿陳之戰五兵永戢七德無虧含生比堯舜之仁率
土陋成康之俗介邱霧息已望翠華之來沂水風生更起
舞雩之詠千歲之統實在於斯臣守在蠻荒獲承大慶抃
躍之至倍萬常情

代表中丞賀分淄青爲三道節度表

臣某言伏見某月日制分淄青諸州爲三道節度都團練
觀察等使者虵豕之穴忽爲樂郊氛沴之餘盡成和氣伏
惟皇帝陛下天付昌期神開寶曆復昇平之土宇拔祿孽
之根源自西自東不違於指顧我疆我理咸得其區分山
川備臨制之形道塗適征徭之便俾侯旣定賜履以寧異

青兗之封爰從古制解曹衛之地實契雅謀車甲永藏馬
牛勿用俗被雍熙之化代知仁壽之期農事載盛於耨芟
儒風重興於俎豆足使季札觀魯更陳南籥之儀山甫徂
齊復正東方之賦臣摠戎遠地不獲陪賀闕庭云云

爲韋侍郎賀布衣竇羣除右拾遺表

臣某伏見今月日制除布衣竇羣右拾遺者臣聞直道之
行四方嚮德逸人是舉天下歸心臣伏以竇羣肥遯居貞
包蒙養正學術精果操行堅明讚詠道真以求其志頌守
藩服特所委知及歸朝廷輒有聞薦庶逃竊位之責以塞
曠官之尤豈謂天聽曲從替言無廢况諫諍之職政化是
參擢於布衣久無其比周行慶抃林藪震驚晦跡寧慮於

遺賢懷才盡思於展效臣以性本庸疎動無裨益唯思進
拔以報恩榮區區懇誠實貫金石言而不廢微臣敢竊於
薦雄德必有鄰聖代式光於尊隗白羣受命冀復面陳迫
以疾病接於休假注心蓄念寤寐兢惶無任喜躍屏營之
至

爲樊左丞讓官表

臣某言伏奉今月二十八日制除臣尚書左丞寵命俯臨
慙顏自失泛大鯨之海但覺魂搖戴巨鼇之山未知恩重
臣聞尚書百揆翊亮萬機故天上尊北斗中樞陛下有南
宮左轄晉昇孔坦諒直當時漢拜楊喬閑練故事庶得百
寮有憚於會府諸侯取法於京師臣實謏先鳥才謬登清

貫握蘭起草昔素朝經剖竹頽條近貽人瘼備歷中外無
聞聲彩版圖載緝貢賦未均於九州銅印更操威儀不檢
於三署次郎補缺豈易其人聖主求才宜難此受切謂旁
求俊乂側訪環竒必使德合準繩言成綱紀興化致理時
無間言況安上必在於薦賢危身莫踰於曠職倘蒙垂收
紫渙俯矜丹誠愚臣保陳力之言聖鑒有責成之地無任
覲冒惶悚之極謹詣朝堂奉表陳讓以聞臣所讓入別狀
封進

爲王戶部薦李諒表

臣某言臣聞知賢必進忠臣之大方擇善而居明主之要
道況臣特受恩遇超絕古今報國之誠寤寐深切是敢竭

愚臣之微分助陛下之至明恢張羽儀宏輔治化臣某誠
惶誠恐頓首頓首切見新授某官李諒清明直方柔惠端
信強以有禮幹而共文求之後來略無其比臣自任度支
等副使以諒爲巡官未及薦聞至某月日荆南奏官勅下
赴本道諒實國器合在朝行臣之所知尤惜其去伏望天
恩授以諫官使備獻納冀他日公卿之任斯焉取斯則聖
朝無乏士之名微臣緩蔽賢之罰無任誠懇屏營之至

爲戶部王叔文陳情表

臣某言臣母劉氏今月十三日忽患暗風發動狀候非常
今雖似退猶甚虛憊驚惶憂苦不知所圖臣唯一身更無
兄弟侍疾嘗藥難闕須臾伏乞聖恩停臣所職今臣見在

家扶侍其官吏等並已發遣訖臣以庸微特久顧遇拔自
卑品委以劇司夙夜兢惶唯思荅效至誠至懇天矜所知
豈慮未效涓塵遽迫方寸以開塞重輕之務加焦勞憂灼
之懷雖欲徇公無由在志況忠孝同道臣子之心許國誠
切於死生報親忍忘於顧復進退窮蹙昧死上陳無任惶
懼懇倒嗚咽之至

代裴中丞謝討黃少卿賊表

臣某云即日奉事官米蘭迴伏奉手詔云者臣聞虜
革既平雖疥癬而必去豺狼已斃在狐鼠而宜除臣某伏
惟元和聖文神武法天應道皇帝陛下受命上元底寧下
土兇渠盡殄威武載揚蠢爾腥膻尙聞凌暴靈旗斜指銅

臨三軍知必勝之方萬姓喜永清之路微臣忝司戎
得親列顏行躡伏波之舊規乘下瀨之故事盡瘁事國期
畢命於戈矛不宿千家思奮身于原野卽以今日某時出
師就道便披榛蹶石摩壘陷堅蕩清海隅永息邊徼切以
才非充國敢自贊於無踰志慕孟公庶追蹤於不伐謬承
重委寤寐兢兢無任感恩隕越之至

爲裴中丞舉人自代伐黃賊表

伏以某官器宇端方風姿詳雅謙虛內敏籌略共推前佐
湖南悉心匡佐後歷郡掾深負政聲惠愛在人姦邪屏息
勤勞已著幹蠱無倫今黃賊尙據荒陬犬巢未覆倘以某
代某之任必能掃蕩氛祲廓清海濱竊惟斯人雅堪厥職

為崔中丞請朝覲表

臣歷刺三州連擢二府外任逾紀入覲無階就日望雲魂
 飛心注伏惟睿聖文武皇帝陛下覆載無私遐邇同致復
 昇平之故事繼前聖之高蹤中外踐更出入迭用臣以虛
 薄叨受恩榮徒竭夙夜之心未申朝夕之敬天威咫尺誠
 寤寐而無違雲漢昭回固瞻仰而何及是以前在朗寧封
 章累上及移臨桂星紀屢周微衷尚隔於戴盆積望徒懸
 於窺管葵藿之誠彌切犬馬之戀逾深人欲天從於茲未
 驗下情上達終冀不誣敢瀆宸嚴罄陳丹懇伏乞賜臣除
 替許至闕庭厠蹈舞於羣寮備班行於散地足趨中禁曰
 觀大明俾成九族之榮以盡百生之幸非敢竊國寶五獻

之禮希康侯三接之恩一覲龍顏萬死為足無任懇迫激
 切之至

代柳公綽謝上任表

肅恭休命晨夜趨程祇荷寵私不遑寢食以月日到所部
 上訖云臣聞古之制爵祿者爵以居有德祿以養有功
 臣本書生宦不期達值某皇帝文明撫運大闢元猷搜采
 眾才幸忝甄錄歷踐中外星霜屢移曾無涓塵上荅鴻造
 忘其薄陋委之雄藩顧無綏馭之能謬忝澄清之寄將何
 以敷宣皇澤普諭天慈唯當察慝以為防視俗而為教獨
 除細故務安黎獻庶幾清靜無擾以慰遠人臣不勝忝冒
 荷恩之至

代李愬襄州謝上任表

捧對綵綸慙悻無地拜命兢悚不知所裁臣凡賤瑣才智
 略無取幸賴先臣緒業累忝國恩天澤曲流遂司節制寄
 深分闔任重專征顧無將領之才謬處衆人之上豈謂宸
 私軫念仁育爲心濡澤無涯德音屢降士衆感悅咸思竭
 忠遂得潛師暗入賊境不意兇渠就戮此皆聖謨豈敢叨
 天以爲己力仰荷殊造重於邱山臣以日月上訖謹當敷
 宣皇化普諭聖慈綏撫三軍又安百姓冀以塵露止荅鴻
 私臣云

代節使謝遷鎮表

鴻私曲臨獨越夷等祇荷明命寤寐不遑臣才非器能謬

膺仕進雖竭盡駑劣刁效忠勤冀寡憊尤取望宦達某宗
 皇帝不以臣儒術淺薄超授禮官尋遷正卽遂忝郡符某
 皇帝不遺臣小善擢處諫曹叨承厚恩備職藩翰顧惟尸
 劣多慙負恩伏遇陛下德紹唐虞無私庶政臣尸素歲久
 譴謫宜加豈冀褒昇更遷重鎮再忝澄清之寄仍同獻替
 之榮將何以上荅天慈下安氓庶臣當務脩農稼率勵遠
 人鋤其姦慝以副勤郵無任云云

爲劉同州謝上表

臣某言伏奉某月日制除臣同州刺史兼本州防禦營田
 長春宮使某月日到州上任訖臣初奉綸言震抃無極及
 臨所部驚懼逾深役軀莫報於乾坤陳力無裨於造化臣

某誠惶誠恐頓首頓首臣出自諸生不習爲吏有恆懦之
質無區處之能託跡儒門乏仲弓南面之德委身郎署闕
馮唐論將之對常懼叨冒清列蕪穢聖朝豈意天聽勿臨
鴻恩薦及八命作牧一麾出守拔自下位寄之雄藩非臣
庸瑣所宜膺據況馮翊密邇王都古稱三輔爰自近代命
秩逾崇有兵食之虞有官室之制皆公卿守相出入由之
仰徵甲令俯窺圖記踟躕無地以兢以惶恩重命輕不知
所効庶當刻精運力夙夜祇勤上奉雍熙旁流愷悌以日
繫月儻或有成庶幾之心慄慄增惕徒望雲而就日喜近
帝鄉將擊壤以成風共歌堯代天威咫尺敢布丹誠無任
悃懇屏營之至

代表行立謝移鎮表

星言卽駕便道之藩祇荷寵榮不敢寧息臣某爰自弱齡
卽忝推擇階緣試吏累忝清資先聖以臣粗知兵要俾統
師徒交蠻俶擾黃賊不馴奉詔俾臣撲滅氛祲士衆賈勇
思酬渥恩冀因此時得立微效豈謂時多疫癘不副憂勤
知臣特深復洗瑕責夙夜感戴捐軀有期徒增憤勇力未
從願微臣不幸釁故重重泣血摧肝載崩載咽陛下龍興
御極寰海永清道暢八埏威加九域鴻和普洽靡不周泰
伏蒙累垂休命遂越等夷循省何人過膺抽擢況臣比臨
此鎮備更夷險故材舊壤宛在目前雖則殊鄉還同衣錦
量巨鼇之力未足負恩猶蚊蚋之微焉能報德將何以宣

揚聖造撫慰疲羸唯當遵守詔條貶棄好惡平均徭賦示以義方持清淨以臨人守無私以奉國重脩前志再礪戈矛展駑駘之効申鷹犬之用庶荒陬夷獠盡沐皇風率土生靈備聞斯慶微臣之志也限以云云

代韋永州謝上表

臣某言伏奉月日制書除臣永州刺史以月日到州上訖受命若驚臨職彌懼臣以無能累更重任神州赤縣實所備嘗過量逾涯每深兢惕不謂聖恩推擇濫駕朱輪祿秩徒增詎施乳哺之惠服命虛受寧興襦袴之謠況此州地極三湘俗參百越左衽居椎髻之半可懇乃石田之餘曠牧守於再秋彌驕獷俗代征賦於三郡重困疲人分災本

出於一時積弊遂餘於十稔撫安未易知法出而姦生子言誠難懼力勞而功寡夙夜憂切不敢違寧庶當宣布天慈奉揚神化以日繫月儻或有成少裨愷悌之風用答生成之造無任感恩隕越之至

謝除柳州刺史表

早以文律參於士林德宗選於眾流擢列御史陛下嗣登寶位微臣官在禮司百寮稱賀皆臣草奏臣以不慎交友旋及禍訥聖恩宏貸謫在善地累更大赦獲奉詔追違離十年一見官闕親受朝命收人遠方漸輕不宥之辜特奉分憂之寄銘心鏤骨無報上天謹當宣布詔條竭盡駑蹇皇風不異於遐邇聖澤無間於華夷庶答鴻私以塞餘罪云

柳州謝上表

臣某言伏奉詔書授臣柳州刺史以今月二日至部上訖
臣前歲以久停官秩去年蒙聖恩除替便欲裂裳裹足趨
赴京師以舊疾所嬰彌年未愈逮及今夏始就歸途襄陽
節度使于頔與臣早歲同官見臣當暑在道懇留在館尋
假職各意欲厚臣非臣所願伏惟陛下光被之德道以洽
於區中憂濟之勤心每徧於天下常以萬邦共理必藉於
循良一物不遺尙延於愚貌假臣寵渥重領方州駑駘復
效於奔馳枯朽更同於華秀臣聞潢污易竭抑有朝宗之
願犬馬無識猶知戀主之誠揣分則然惟天知鑒况臣昔
因左官一紀于外子牟馳心於魏闕汲黯積思於漢庭豈

非夫人獨無斯戀去就者榮辱之主朝廷者以進之源臣
子之宜忠貞所志臣雖心同犬馬而分比潢污幸躡康衢
意非往蹇臣之此誠口不能喻意欲悉達文非盡言此臣
所以自咎自恨復乖志願猶冀苦心勵節上奉詔條惠寡
郵貧下除人瘼恭宣皇化少荅鴻私不勝悚惶之至

代廣南節度使舉裴中丞自代表

前件官器宇深沉天才間出爰從撫字逮於察廉所職恪
勤庶務皆勸日者安南夷獠反叛害其連帥毒痛黎人某
皇帝以某威惠茂著自某州刺史俾之撫臨夙夜經行盡
除兵器賊徒識恩黨種歸義炎荒之俗靡不底寧後改鎮
容州勲效彌顯澄清庶類邁德前修深負能名合遷重鎮

臣自惟凡懦不逮前人伏乞天恩廻授某非惟旌德是亦飾能庶微臣免尸祿之憂某獲無私之舉

奏薦從事表

某績茂戎軒才優管記操刀必割豈謝剗犀落筆不休寧慙倚馬況早登科選夙洽時譚匪惟詞藝雙美抑亦器能多適比於流輩頗爲滯淹輒敢薦陳伏希獎錄

代廣南節使謝出鎮表

鴻霈曲臨惶駭交集捧對綸綍不知所圖臣謝臣聞蕭曹佐漢六合爲家夷望匡周萬方同軌臣幸以芻賤累忝殊榮天德薦臨遂加台政不能翊宣明聖增日月之光俾兇渠勦絕人用康寧寔由臣不稱職使此艱患伐檀興議負

乘招譏常懷覆餗之虞敢望專征之寄獻俘未遠展効有期希此微功上荅殊造無任云云

爲楊湖南謝設表

臣某言中使某乙至奉宣聖旨賜臣長樂驛設者恩榮殊飲饌斯及顧茲厚禮猥集微躬臣某誠歡誠慶頓首頓首臣以多幸屬此昌時任重方隅職忝文武甘受素餐之刺知無肉食之謀以憂以惶寢寐無措豈謂鴻恩繼至豐膳爰來陸海兼陳飴醴皆設庶當奉揚聖澤覃布遠人流愷樂於皇風均乳哺於赤子少陳微効上荅殊私無任感恩欣躍之至

爲武中丞謝賜櫻桃表

卯文

卷之三十八

七

臣某言中使某乙至奉宣聖旨賜臣櫻桃若干者天睠特
深時珍海降寵驚里巷恩溢圓方臣某誠喜誠懼頓首頓
首伏以含桃之羞時令攸貴況今採因御苑分自天厨使
發九霄集繁星而積耀味調六氣承湛露而不晞盈皆而
外被恩光適口而中含渥澤顧慙素食彌切自公豈圖君
子所先遂賦小人之腹無任云云

謝賜時服表

祇荷寵私啟處無地臣謝中臣久忝朝行歷職無効在苒星
紀偷榮歲時不能少益聖猷以副深寄致使賊遺君父艱
難未息合處嚴憲以正國章伏以陛下恢天覆之恩廣地
載之厚不循彝典俾同冕紱重劇邱山捧戴以入閨門空

知夕惕裁縫而為衣服固可晝行內省疲駑將何荅效

謝賜端午綾帛衣服表

綸言曲臨寵服薦至跪奉殊錫慶躍交并臣謝中臣謬典方
州教微涓滴叨承大貺榮重邱山非才忝恩俯伏慙荷朱
明啟節御府賜衣沐聖澤而溟海方深被僊衣而鶴龜齊
壽馳心向闕踟影望天慙分五嶺之憂莫副九重之詔臣
無任云云

柳文卷之三十八終

卯文

卷之三十八

七

柳文卷之三十九

奏狀

爲廣南鄭相公奏百姓產三男狀

右臣所部貞節坊百姓某妻產三男者臣詳究往例實謂
休徵已量事給絹三十疋充其乳養者伏以陛下勤郵黎
元感通天地靈心昭荅景福已興方使億兆繁滋區夏充
物故表祥於字育是啓運於升平事杳化源慶延邦本鱗
羽之瑞曾何足云臣幸列藩維嘗叨樞近私賀之至

爲薛中丞浙東奏五色雲狀

右臣得管內台州奏月日五色雲見者一州官吏僧道耆
老悉皆瞻覩已具奏聞并寫圖奏進者伏以景雲上瑞玉

柳文

卷之三十九

褚祉符煥彩彰之在天知聖德之昭感伏惟陛下化孚有
截道洽無垠承天地之貞明蕙陰陽之和氣遂使紛紛郁
郁自東而徂西若煙非煙一旬而再至徵諸古諫事罕前
聞伏乞宣仁史官以昭簡冊

爲裴中丞奏邕管黃家賊事宜狀

右今月四日邕管奏事官嚴訓過稱押衙譚叔向等與黃
家賊五千餘人謀爲翻動雖已誅斬猶未清寧當時差本
道同十將某至邕管界首賓州以來迎探事宜兼爲聲援
昨得十四日狀并嚴訓狀報同其黃家賊並已退散各歸
洞穴訖伏以鼠竊狗偷非足爲患陛下威靈遠被神化旁
行遂使姦狡之謀先期而白露回邪之黨不戮而盡夷伏
忝接壇界所得事宜不敢不奏

讓監察御史狀

右臣伏準名例律諸官與父祖諱同者不合冒榮居之臣
祖名察躬今臣蒙恩授前件官以幼年逮事王父禮律之
制所不敢踰臣不勝進退惶恐之至謹詣光順門奉狀以
聞伏聽勅旨貞元十九年閏十月日具官臣某奏奉勅新
除監察御史柳宗元祖名察躬準禮二名不偏諱不合辭
讓年月日檢校司空同中書門下平章事杜右宣

爲京兆府昭應等九縣訴夏苗旱損狀

右臣謬領京畿已逾兩月政術無取誠懇莫申遂使雨澤

憊時田苗微損夙夜兢懼寢食靡遑今長安一十四縣並
準常年例全徵其昭應等九縣臣各得狀並合詳審各絕
隱欺謹具別狀封進臣當府夏稅通計約二十九萬石以
上據所損矜免祇當三萬石有餘恤人則深減數非廣伏
以聖慈宏貸憫念蒸黎臣忝職司不敢不奏無任慙懼之
至謹錄奏聞伏聽勅旨

為南承嗣請從軍狀

故某官贈某官某乙男某官某乙

右臣亡父至德之歲死節雖陽陛下每降鴻恩必加褒寵
臣自七歲即忝班榮垂五十年常居祿秩再守遐郡績用
無成終貽官謗其就嚴譴無以負荷先志報効殊私以慙

以懼隕越無地伏見某月日勅以王承宗負恩干紀命將
徂征雷霆所加殄滅在近臣竊不自揆思竭忠誠願預一
卒之任以荅百生之幸庶得推鋒觸刃摩壘攀旗冀獲盡
於微試儻不墜於遺烈踴躍之至夙夜不寧敢希皇明俯
鑒丹懇臣聞周官考藝國子置車甲之司漢道推恩孤兒
備羽林之用千秋思奮於事越仲孺期死於奔吳義激君
親名高竹帛臣雖無似有慕昔人雖身塗草野死而不朽
披肝瀝血昧死上陳無任懇迫忠憤之至謹錄奏聞伏候
勅旨

進農書狀

右伏奉某月日勅宜以二月一日為中和節所司進農書

永以為恒式者臣伏以平秩東作虞書立制俶載南畝周雅垂文此皆奉天時以授人盡地力而豐食自陛下惟新合節益厲農功既立典於可傳每陳書而作則耕鑿之利敷帝力於嘉謨稼穡之難動天心於睿覽勤勞率下超邁古先凡在率土不勝幸甚前件農書謹函封進謹奏

代人請瓷器狀

瓷器若干事右件瓷器等並藝精埏埴制合規模稟至德之陶蒸自無苦窳合大和以融結克保堅貞且無瓦釜之鳴是稱土錙之德器慙瑚璉貢異器音奴丹既尚質而為先亦當無而有用謹遣某官某乙隨狀封進謹奏

柳州舉監察御史柳漢自代狀

右某準從前赦文常參官上後舉一人自代者伏見前件官頗有才行長於政術久歷頡南使職臣之所知敢舉自代無任懇迫之至

上戶部狀

右伏以左降官是受責之人都不釐務戶部錢是準勅收貯不合別支又所授員外官亦非舊制宗元在永州日見百姓庄宅公驗有司戶李邕判給處足明皆是正官今請悉依故事為準並廢員外所置凡在貶黜授以正員責其成功俾無虛授貯錢既免支用加數足應軍須實冀貨不濫分官無曠職謹狀

柳州上本府狀

卯文

卷之三十九

日

右奉牒準律文處分去聲者已帖縣準牒待秋分後舉處分
訖伏以中丞慈惠化人孝悌成俗屬吏所見皆許申明至
公之下敢竭愚慮竊以莫誠赴急而動事出一時解難為
心豈思他物救兄有急難之戚中臂非必死之瘡不幸致
殂揣非本意按文固當恭穿撫事似可哀矜斷手方迫於
深衷周身不遑於遠慮律宜無赦使司明至當之心情或
未安守吏切惟輕之願況俟期尚遠稟命不遙伏乞府賜
興哀特從屈法幸全微命以慰遠黎則必闔境荷慈育之
恩豈惟一夫受生成之賜儻以律文難變使牒已行則伏
望此狀便令廢格音閣輕賜塵黷惶戰交深謹錄狀上奉聽
處分

為裴中丞伐黃賊轉牒

當管奉詔與諸管齊進誅討邕管草賊黃少卿漢軍馬步
等若干人各具兵馬數及軍將若干前牒奉處分竊以天
啟昌期大功畢集神開興運微惡盡除黃少卿等歷稔逋
誅舉宗肆暴恃狡免之宄踰伏偷安憑孽狐之邱跳踉見
怪以為威弧不射天網可逃侵逼使臣隳犯王略恣其毒
虐速我誅鋤敵國盡在於舟中還師已期於席上謂宜投
戈頓額面縛乞身歸郡邑於王官效黎獻於天吏而乃繕
兵補卒增壘閉途正當天討之辰更積鬼誅之罪眾輕鬪
蟻勇劣怒蛙織綿當強弩之初孤豚債肥牛之下事同拾
芥力易摧枯杪忽蜂腰虛見辱於齊斧突梯鼠首濫欲寄

柳文

卷之三十九

五

於旄頭勦絕有時不索何獲某拱稽致命執銳忘生車甲
既備於小戎鯨鯢豈逃於誅戮切觀上略總帥中權戰士
義激於身心列校勢成於臂指蹶張之技盡出於山林拔
距之材徧徵於川洞賞懸香餌令布疾雷莫不鼓舞戎行
虔恭師律投軀不憊於羽檄跂足唯俟於牙璋今月某日
奏事官米蘭廻捧受詔命神飛首勇足蹈心馳懽聲洽於
萬夫勝氣橫於千里國容不入屨且及於寢門家事勿關
土已填於左闔卽以月日全軍出次分道並進所期勦力
敢告同心孔大夫貞直冠時清明格物全體許國一心在
公兵精食浮爲日固久容府楊中丞以義烈爲己任勲襲
太常安南季中丞以英武爲家風業傳彝器並膺邦寄克

達皇威南則浮海濟師共集堂堂之陣東則橫江誓眾用
成善善之功以此鼓行坐觀盡敵刑惟勿喜誅有可哀徵
側之勇冠一方竟就伏波之戮呂嘉之威行五嶺終摧下
瀨之師嗟此陋微自貽擒滅勉成良畫速致殊勲雖荒徼
之地固不勞於有征而昇平之年將自此而何事書之竹
帛實謂揚名事須移牒鄰管以成犄角舉牒者

賀誅淄青逆賊李師道狀

右今月三日得知進奏官某報前件賊以前月九日克就
梟戮者伏以天啟聖期神資良弼必有懲討以致昇平蠢
爾兇渠敢行悖亂締交於雷霆之下效逆於化育之辰逞
豺聲以欺天恣狼心而犯上嘉謨克協威命旁行破竹寧

比其發機走丸未喻於乘勝濁河清濟曾無溝洫之虞大
峴琅琊不聞涯岸之阻天兵四合賊眾屢摧然後赦劫脅
之辜許其歸復寬誥誤之典期以撫循外恒皇威中感聖
德雖在梟鏡當作豈不知歸是以未極誅鋤遽聞內潰鯨
鯢已戮見東海之無波氛沴盡銷仰太陽之普照功格于
天地化合于陰陽一德方繼於商書降神自同于周雅遂
使垂白遺老再逢天寶之安措紳諸生遠期貞觀之理某
特承朝獎謬列藩臣常以突刃觸鋒未爲效節膏原潤草
豈足酬恩寤寐撫心不遑寧處今則削平之際慙無尺寸
之功開泰方初徒受邱山之寵無任憤激屏營之至抃舞
歡慶倍百恒情

賀平淄青後肆赦狀

某官某乙右某伏奉二月二十二日德音以淄青削平慶
賜大洽率土之內抃躍無窮伏惟周滅三監但明誅放之
罰漢平七國更嚴斬殺之科未有翦覆兇渠撫存疑類威
暫行而德洽誅纔及而恩加操兵者悉獲歸休秉耒者更
聞優復與之種食豐以貨財疾苦盡除鰥孤咸育塋戰死
之骨增以賞延憐刃傷之肌存其廩給滌山川之舊汚申
節義之餘寬功多受三事之榮節著有十連之寵較然逆
順益以彰明和氣遠周罷七旬之干羽仁風溥暢收六月
之車徒寰海永康夷夏均慶某忝司戎旅獲奉昇平當伊
尹無耻之辰見咎繇惟輕之德抃躍之至倍萬恒情無任

慶賀之至

賀分淄青諸州爲三道節度狀

右某伏見某月日制分淄青諸州爲三道節度都團練觀察等使者害氣盡除和風溥暢裂壤旣分其形勝經野必正其提封河濟異宜海岱殊服八命作牧無聞威福之源十國爲連已肅澄清之政鼠無夜動鴉變好音惠澤豈俟於崇朝仁化寧期於必代遂使琅邪卽墨田生無慮其異謀聊攝姑尤晏子但聞其善祝恭以相公暮參禹績制出蕭規光輔聖神永康黎獻某獲逢開泰忝守方隅抃躍之誠倍百恒品

代裴中丞上裴相賀破東平狀

右伏以逆賊李師道克就梟擒已具中書門下狀賀訖某忝居末屬特受深恩踴躍不寧輒復披露竊以自古中興之主必有命代之臣一德同功以叶休運故申甫方邵成宣王復古之勲吳鄧寇耿致光武配天之業此皆上下齊志中外悉心雖成功則多而陳力甚易豈若閣下挺拔英氣邁越常流獨契聖眷以昌鴻業廟略初定異議紛然詆訕盈朝萋斐成市閣下秉心不惑定命彌堅討淮右之兇則下車而授首服恒陽之虜則馳使而革心况師道惡稔禍盈鬼怨神怒恣行悖慢敢肆欺誣天兵四臨所至皆捷次又捨其將校許以歸還罪止一夫恩加百姓豺狼感化梟鏡懷仁自致誅夷以成開泰萬方有慶四海無虞遂令

率土之人盡識太平之理盛德大業振古莫儔然則布政
明堂勒功東嶽光垂後祀輝映前王神化允屬於聖君崇
勲實歸於宗袞慶賀之至倍萬恒情

爲裴中丞乞討黃賊狀

某材質無堪授任非次當有事之日忠懇莫施遇成功之
辰慙憤空積陳力之志誓死不渝伏惟仁恩終賜展効今
者中華寧謐異類服從唯此南方尙餘寇孽伏以黃少卿
等憑培塿以自固合莖脆以爲強劫脅使臣侵暴列郡雖
狐鼠之陋無足示威而蜂蠆之微猶能害物必資翦伐方
致和平庶盡驚蹙之勞以荅恩榮之重撫心踊躍夙夜不
寧私布丹誠敢期明鑒無任感激屏營之至

爲桂州崔中丞上中書門下乞朝覲狀

右某幸遇文明叨承委寄理戎典郡十有四年瞻戀闕庭
神魂飛越頃在邕州累陳誠懇謬尸進律之寵未遂執珪
之願相公膺賢輔聖大叙彞倫中外之臣出入更踐某自
領桂管又逾再周企鸞鷲於紫霄獨無羽翼仰星辰於黃
道徒竭丹誠況正月會朝遠夷皆至六歲來見要服有期
豈使班超之望長懸子牟之戀空積伏乞特申微願錄受
冗員徵故事而不遺揆夙志而斯畢入天子之國願附禮
於不俟拜宰相之車敢希榮於上客無任懇禱屏營之至
輕瀆威重戰汗伏深謹狀

爲南承嗣上中書門下乞兩河効用狀

右伏以越敗夫差多會稽納官之子趙摧栗腹卽長平死
事之孤何者義烈之餘色氣猛厲上將効於國用下欲濟
其家聲所以憤激悽愴常思致命者也某先父死難睢陽
事存簡冊累降優詔榮及子孫爰自緼綵超昇品秩肉食
廩給未嘗暫停頃守涪州屬西蜀遭逆將致死命以盡夙
心寢戈嘗瞻志願未究會刀筆之吏寘以深文首級之差
今復誰辯薏苡之謗不能自明猶賴舊勲謫居樂土食人
力之粟守無事之官拳拳血誠無所陳露伏見明制興師
討伐恒冀蓂爾小醜尙欲逋誅某才非古人志慕前烈願
得身當一隊効死戎行竭平生之忠懇申幽明之冤痛撫
劍心往發言涕零嘗聞漢法有奮擊匈奴者諸侯不得擁

遏又況丞相揔軍國之重定廊廟之謀固當宏獎無所棄
捐伏乞哀憫收撫以成其心無任懇迫惶恐之至

柳州上中書門下舉柳漢自代狀

右伏準元和六年十月十七日勅常參官授上後三日內
舉一人以自代便具所舉人兼狀上中書門下者今奏請
前件官自代謹連狀

爲長安縣耆壽詣相府乞奏復尊號狀

長安等縣耆壽某乙若干人右某等伏以生長明時游泳
皇澤鼓腹且知於帝力食毛敢忘於君恩竊見近者祥瑞
所呈周於百郡豐稔之報均于四方有以知上元降靈誕
告嘉應彰我君文明之化仁育之恩大道旣行鴻名未舉

是以殷勤昭著如斯而不已者也某皆陶煦純仁成此耆
 老生既無補死而何求唯願上聞帝闈復建尊號用彰聖
 德以報皇慈披露血誠伏守天闕糜軀碎骨猶生之年謹
 以今日詣光順門輒進表訖伏惟相公贊翊明主共致太
 平而使名號尚鬱天人失望草野愚鄙切有感焉伏望敷
 奏之際開陳其要俾下情允達大願克從退就泉壤樂而
 無恨輕贖國相伏待典刑謹狀

為京畿父老上府尹乞奏復尊號狀

長安縣耆老某乙等若干人右某等幸以羸老獲覩昇平
 蹈舞薰風謳謔壽域譬之草木何以報天寤寐焦勞不知
 所措伏見聖君臨御元化升聞瑞應匝於萬方豐報窮於

四海神祇注意天地傾心覺悟生人必有為者蓋以挹攬
 徽號近二十年盛德益光大名未復致遠邇積慮幽明憤
 懷故自古以來嘉瑞之至未有如今歲之盛也斯乃上元
 深旨下人懇誠勤勤相符正在於此某等眷戀明時朝夕
 是切惟願早復大號以契天心庶得聖政益光鴻化彌遠
 少遂踊躍之甚今請詣光順門進表昧死上陳伏以待郎
 道合君臣惠敷黎庶儻遂收採愚慮致貢天庭俛草萊微
 誠得達萬乘非所敢望惶懼伏深謹狀

柳文卷之三十九終

卯文

卷之三十九

